

Date – 03/01/2025  
Time - 7:30 -7:40Hrs

## REGIONAL NEWS BULLETIN

### HEADLINES (MORNING)

1. Kumthar 2025-ah ASF vawk pulhri avangin vawk thi leh suat a la awm lo
2. Aizawl district tih loh district dang 10-ah raltnante hnena a thlawna buhfai sem hna chu zawh a ni tawh.
3. Kum 10 kalta chhunga ram chhunga eizawnna hna siam zat chu za-a 36-in a pung.
4. National Sports Awards dawng tur puan a ni.

<><><>

### ASF UPDATE

January ni 1 leh nimin khan African Swine Fever (ASF) vawk pulhri avanga vawk thi leh suat a awm loh avangin kumin 2025-ah ASF vawk pulhri avangin vawk thi leh suat a la awm lo a ni.

Animal Husbandry & Veterinary department hotute'n an chhinchhiah dan chuan kum hlui 2024 February ni 9 a Champhai district Leithum khua a ASF vawk pulhri vei an finfiah atanga nikum chhung zawnga he vawk pulhri avanga vawk thi zat chu 14,950 a ni a. Vawk pulhri darh zel tur venna atan vawk 24,177 suat a ni bawk. Mizoram vawk pulhri leng hian thlasik intan November atang khan zia-awm lam a pan chhova, mimalin vawk tam tham an vulhna hmun pulhri-in a luh chilh avanga thi leh suat tam ni deuh a awm leh zauh thin chungin a zia-awm chho zel a. December thla khan thi leh suat a tlem tawh hle a ni.

March ni 21, 2021 khan Lunglei district a Lungsen khua-ah ASF vawk pulhri vei hi finfiah hmasak ber a ni a. Hemi atanga nikum thlenga he vawk pulhri avanga vawk thi zat chu 62,167 a tling tawh a. Kum 2021 khan vawk 33,417 thi-in kum 2022 khan 12,761 thi-in niklum khan 1,039 a thi leh bawk a ni. Vawk suat zat hi kum 4 chhung khan 49,267 a ni a. ASF vawk pulhri avanga Mizoramin vawk a chan zawng zawng chu nuai 1, sing 1, sang 1 leh 434 zet a ni.

<><><>

### NEW YEAR FEASTS

Nimin khan kohhran hrang hrangin kum thar lawmna ruai an theh.

Ruai theh hi kumthar lawmna hun kharna a ni a, khaw thenkhatah erawh chuan ruai nawn an awm tura ngaih a ni a. Kum thar ni khan kohhran tam ber chuan thingpui leh chhang ruai thehin a ni khan kum thar lawmna ruai an theh a. Nimin lama ruai theh kohhran thahnem tak an awm bawk a. Thenkhat chuan Kumthar ni khan ruai theh mah se, nimin khan ruai an nawn a ni. Nimin khan biak-ina inkhawm leh lengkhawm an awm bawk a, tlai lamah ruai hi an theh a, heti hian kum thar lawmna chu a tiak ta a ni.

Champhai District a khua leh veng tam zawkah nimin khan kumthar 2025 lawmna ruai kilho a nih laiin kohhran thenkhat chuan vawiinah kumthar lawmna ruai an buatsaih a, zanin inkhawm banah kumthar lawmna an tiak ang. He tih lai hian Champhai Tlangsam Presbyterian kohhran chuan kum kalta 2024 ah an kohhran mi thi an awm miah loh avangin nimina kumthar lawmna ruai an kilho hnuah vawiin khan Pathian hnena lawmthu sawina inkhawm an buatsaih bakah vawiin khan lawmna ruai an theh a ni.

Lawngtlai-ah chuan nimin khan ruai nena Kumthar lawmna chhunzawm lote pawhin Pathian faka zaikhawmin kumthar lawmna hi an chhunzawma, Kohhran hrang hrangte'n January 5, Pathianni zan thleng Kumthar lawmna zaikhawm nei turin ruahmanna an siam. Lawngtlai khawpuiah dawr inhawng mumal a la awm lova, eichawp zawrhna leh damdawi dawr bak inhawng mumal a awm lo a ni.

Saitualah pawh kumthar ni kha Pathianni anga serh niin Chawhma, chawhnu leh zan lamah thupui neiin Kohhran hoten Pathian thuchah an ngaihla a, inkhawm kar lakah lengkhawm awmin hlim takin Kumthar hman a ni a. Nimin khan Kohhran tam zawk chuan ruai an theh a. Zan lamah lenkhawm programme siam Kohhran engemaw zat an la awm a, lenkhawm a zawk hnu-ah Kumthar lawmna hi a ḥiak ta a ni.

Kolasib district-ah chuan kum thar ni khan Catholic, ICI, UPC leh Kohhran thenkhatin Kumthar lawmna ruai an theh a. Niminah Kohhran thahnem takin kumthar lawmna ruai an theh bawk a ni.

<><><>

#### GOVERNOR

Mizoram larsap kal chhuak Dr. Hari Babu Kambhampati chuan nimin tuk dar 8 khan Aizawl Raj Bhavan a chhuahsan.

Larsap hi a secretary leh Raj Bhavan hnathawk dangte'n an thlah a. Chawhma dar 9 velah Lengpui tummun thleng thla-in hetah hian chief minister Pu Lalduhoma, assembly speaker Pu Lalbiakzama, home minister Pu K. Sapdanga leh PWD minister Pu Vanlalhlana te bakah chief secretary Pu Khilli Ram Meena, DGP Pu Anil Shukla te bakah Aizawl bawrhsap, SP leh state protocol officer-te'n lo dawngsawngin Police-te'n chawimawina sang 'guard of honour' an hlan a. Lengpui tummun amah thlahna inkhawmah hian Pu Kambhampati chuan Mizoram a cham chhunga tawiawmna leh duhsakna hrang hrang a dawn thin avangin lawmthu a sawi a. Mizoramin hmasawn tura theihna nasa tak a neih thu leh hengte hi chak taka bawhzui a ngaih thu sawiin, inthlanna leh assembly inkhawm kalpui dante chu ram chhung hmun dangte tana entawntlak tak a ni, a ti a. Mizo thalaite'n theihna leh thiamna an neih that thu sawiin, thiam thil zirna kawnga intuiahriam leh State pawnna hna thawk thei tura hmalak zel a tul thu a sawi a ni. Chief Minister Pu Lalduhoma pawhin he hunah hian Mizoram tana tha leh tui a lo sen tawnate avangin larsap hnenah lawmthu a sawi a. A hna thar tur atan duhsakna a hlan bakah remchang hmasa bera Mizoram rawn tlawh leh turin a sawm bawk a ni. Larsap kalchhuak hi chawhma dar 10 leh minute 15 khan Bhubaneswar panin a thlawk liam ta a ni. Ruat a nih angin naktukah Bhubaneswar Raj Bhavan-ah thu tiam tira Odhisa larsap tura lakluh a ni dawn

a ni. Puan tawh angin Pu Kambhampati hian July ni 19, 2021 khan Mizoram larsap hna a chelh tan a, Pu P. S. Sreedharan Pillai a rawn thlak a ni. A hun chhung hian Mizoram hmun hrang hrang a tlawh kual a, Mizoram hmasawnna atana rilru leh ngaihtuahna seng tak ni a ngaih a ni a. A bikin sorkar laipui-in mirethei zawkte khaichhuahna atana ruahmannna a siamte Mizoram a a mamawhte'n hmang tangkai tawk lo leh hre tawk lova a hriat avangin hetiang lam hi thahnemngai takin a tlangaupui thin a ni.

<><><>

#### GINGER

Adviser to Chief Minister (hand-holding policy) Dr. K.C. Lalmalsawmzauva'n Mizoram sorkarin kumin January leh May thla chhung hian sawhthing a lei dawn thu a sawi.

Adviser to CM chuan bana kaih ruahmannna hnuai a January leh May thla inkara sawhthing lei chungchang hi vawiin January ni 3-a Mizoram Agriculture Marketing Board thutkhawm hnuah tihfe a nih tur thu a sawi a. Sawhthing chingtu inzawmkhawm pawl society 675 an inziahluh tawh thu a sawi-in anni kaltlang hian sawhthing hi a lei tura ruatte'n an lei dawn tih a sawi a. Akashvani Aizawl palai zawhna chhangin Adviser to CM chuan loneitute sawhthing thar grade a then chungchang chu a leitu tur sumdawngte leh society-te inbiak remna ang zel tur a nih thu a sawi bawk.

Agriculture department chhinchhiah danin Mizoram chhungah sawhthing quintal nuai khat sing ruk sang riak za nga sawmriat pathum leh kg 28 lin a ni a. Hemi atang hian quintal nuai sawm sing kua sang thum za hniih sawmkua pakua leh kg 76 thar chhuah beisei a ni. Serchhip district chu sawhthing ling hnem ber an ni a, sawhthing quintal sing nga sang sarih za ruk sawmli leh kg 613 lin a ni a, thar beisei zat hi nuai 3, sing 4, sang 1 leh 840 a ni a. A block ang zawnga ling hnem ber pawh Serchhip District chhunga mi East Lungdar block niin quintal sing thum sang khat sawmrak pasarih leh kg 698 an ling a, thar beisei zat hi quintal nuai 1 sing 8, sang 6 leh 2 leh kg 57 a ni. Sawhthing ching tlem ber Hnahthial district chuan sawhthing quintal 7,171 leh kg 76 an ling a, quintal 46,775 thar an beisei.

Mizoram pumpui chhutin sawhthing hi ram acre 27,608 chuang a zau ah lin a ni a, chhungkaw 25,102 ten sawhthing hi an ling a ni.

<><><>

#### MIZORAM PWD

Mizoram PWD hnuaiah hna ruak hnawh khah loh 318 a awm mek.

Aakashvani palai zawhna chhangin Mizoram PWD hotute chuan SDO, JE, Overseer leh SA-ah an indaih loh nasat thu an sawi a, tun dinhmunah SDO-ah post ruak 63, Junior Engineer ah post ruak 148, Overseer-ah post ruak 13 leh Sectional Assistant-ah post ruak an neih mek thu an sawi. Heng post ruak hnawh khah lohte hi sanctioned post atanga chhut a za zela 42 a nih thu an sawi. PWD hotute chuan an post ruak neihte thuneitu lamin a theih dan ang ang a hnawh khah sak an mamawh hle thu an sawi bawk.

<><><>

## AIR NEWS ON SOCIAL MEDIA

**Chanchinhar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinhar hi ngaihthlak leh chhiar theih a dah a ni.**

**Vawiin chawhnu dar 2 leh a chanve-ah Chanchinhar hi puan leh a ni ang.**

<><><>

## RICE FOR REFUGEES, IDPS

**Aizawl district tih loh district dang 10-ah raltnante hnena a thlawna buhfai sem hna chu zawk a ni tawh.**

Raltn tam berna Champhai district-ah chuan raltn 14,390 hnena buhfai quintal 4,533 chu sem zawk vek a nih tawh thu Champhai district bawrhsap Pu V.L. Remliana chuan Akashvani Aizawl a hrilh a. Champhai district-ah hian Myanmar raltn 13,986 awmin Manipur atanga sahimna zawnga awm mi 404 an awm mek bawk a ni. Champhai district dawta raltn tamna ber Lawngtla district-ah pawh raltn 8,020 hnena buhfai quintal 2,526 sem zawk a ni tawh bawk a. Lawngtla district-ah hian Myanmar atanga raltn mi 5,922 leh Bangladesh Chittagong Hill Tracts atanga raltn 2,014 an awm mek a, Bangladesh raltnante hi district hrang hrangah awm darh lovin Lawngtla district-ah chauh an awm a. Buhfai sem hna hi kum hlui November ni 11 khan Lawngtla district bawrhsap Pu Cheemala Siva Gopal Reddy chuan a lo hawng tawh a ni. Raltn awm tamna district pathumna Siaha-ah pawh raltn 5,953 te hnena buhfai quintal 1,875 sem a ni tawh a. Siaha district bawrhsap Pu V.L. Hruaizela chuan November ni 20 atang khan buhfai hi an sem tan tawh thu a sawi. Siaha district-ah hian Manipur raltn an awm lova Myanmar atanga rawn raltn hlang an ni. Raltn awm tlemna ber Khawzawl district-ah chuan raltn 147 chauh an awm a, an zinga 19-te hi Manipur atanga rawn kal niin 128 te hi Myanmar mi an ni a, buhfai quintal 46 an sem zo tawh bawk a ni.

**Aizawl district-ah erawh chuan tun hnai khan buhfai sem hna hi tan chauh a ni a. A khaw tlai chhan hi Aizawl district a raltn awm tam tak hi a thlawna buhfai dawn ngai lo tura khawsa theite an nih avangin an thlit fim chhungin hun a duh deuh niin an sawi.**

**Sorkar laipui Ministry of Home Affairs chuan Mizoram raltn awm zawng zawng tana a thlawna buhfai semna turin cheng vaibelchhe 5 a ruahman a. He pawisa hian buhfai metric tonne 1,379 chuang chu Ministry of Consumer Affairs, Food and Public Distribution hnena buhfai lei-in Food Corporation of India (FCI) kalthangin Mizoram sorkar Food, Civil Supplies & Consumer Affairs department chuan ruahmanna siam lawk angin district tinah an chanpual tur theuh an thlen sak a. Chu chu district tina thuneitute'n an district chhungah an lo sem chhuak leh a ni.**

**Mizoram sorkarin Ministry of Home Affairs hnena buhfai sem dan tur report a pek na a raltn awm zat a thehluh chu mi 43,788 a ni a. Myanmar raltn 33,764, Manipur atanga lokal 8,010 leh Bangladesh raltn 2,014 te an ni a. Buhfai hi mi pakhat zela kg. 31 leh gram 500 zela sem tura chhut a ni.**

<><><>

## EMPLOYMENT GENERATION SOARS BY 36% DURING PAST DECADE

Kum 10 kalta chhunga ram chhunga eizawnna hna siam zat chu za-a 36-in a pung.

Labour and Employment Ministry sawi danin, kum 2014 atanga 2024 inkar chhung khan hna thawh tur Vbch 17 chuang siam belh a ni a. Nikum chhung ringawt khan eizawnna hna Vbch 4 leh nuai 60 vel siam belh a nih thu Ministry chuan a sawi bawk.

Kum 2014 leh 24 inkar chhunga eizawnna hna za-a 36 siam belh chu kum 10 chhung rau rauvah 2004 leh 2014 inkar chhunga za-a 7 siam belh ai khan a tha zawk hle tih Ministry chuan a sawi a. Kum 2004 leh 2014 inkar chhung khan UPA sawrkar khan eizawnna Vbch 2 leh nuai 90 a siam belh a ni.

<><><>

## OVER 15 LAKH ELECTRIC VEHICLES INCENTIVIZED UNDER FAME-2 SCHEME: GOVT

Sawrkar chuan Faster Adoption and Manufacturing of Electric Vehicles, FAME-2 scheme hnuiah kawlpetha hmang lirthei (electric vehicle) nuai 15 chuang man man zawka hrallchhuah a nih tawh thu a sawi.

Chu'ngte chu lirthei ke 2 nei nuai 14 chuang, lirthei ke 3 nei nuai 1 sing 1 sang 9 leh lirthei ke 4 nei sing 2 sang 2 a ni.

He scheme hi kum 2015 khan nasa zawka kawlpetha hmang lirthei siamchhuaha mipuiten an hman nasat zawk theihna tura duan a ni.

Heavy Industries Ministry chuan FAME-2 scheme hnuiah hian kawlpetha lirthei hmangtuten battery tui an thunna tur (Public Charging station) sing 1 sang 1 bun a nih thu an sawi a. Sawrkar chuan chhevel leh boruak tana him lirthei, mipuiten man man zawka an chuan theihna tur kawng hrang hrang a dap reng thu a sawi bawk a ni.

<><><>

## NATIONAL SPORTS AWARDS 2024 ANNOUNCED

Nimin khan National Sports Awards dawng tur puan a ni.

World Chess Champion D Gukesh, Paris Olympics-a medal 2 dawng Manu Bhaker, Indian Hockey Team Captain Harmanpreet Singh leh Paris Paralympics-a Gold Medal dawngtu Praveen Kumar-te chu Major Dhyan Chand Khel Ratna Award hlan an ni ang.

Sport huang hrang hranga titha 32 hnenah Arjuna Award pek an ni dawng a. Hranghlui Sucha Singh leh tui hleuh thiam Murlikant Petkar-te chu Arjun Awards (Lifetime) pek an ni ang.

Para-Shooting coach Subhash Rana, Shooting coach Deepali Deshpande, Hockey coach Sandeep Sangwan, Badminton coach S Muralidharan leh Football coach Armando Agnelo Colaco-te chu Dronacharya Award pek an ni ang.

**Physical Education Foundation of India chu Rashtriya Khel Protsahan Puraskar pek a ni dawn a.**

**Chandigarh University, Lovely Professional University leh Guru Nanak Dev University, Amritsar-te chu Maulana Abul Kalam Azad Trophy pek an ni ang.**

**Heng chawimawinate hi tun thla ni 17 khian Rashtrapati Bhavan-a a bika hun buatsaih-ah President Droupadi Murmu-i chuan a dawngtute hnenah a pe dawn a ni.**

<><><>